

فريق التفريغ بموقع الطريق إلى الله  
يقدم  
من سلسلة "صرخات للغافلين"

الحلقة الثانية عشر

(باللهجة المصرية)



لفضيلة الشيخ: حازم شومان

رابط المادة: <http://way2allah.com/khotab-item-120260.htm>

السلام عليكم ورحمة الله وبركاته، الحمد لله وكفى وصلاةً وسلاماً على عباده الذين اصطفى، اللهم لك الحمد كله ولك الملك كله ويديك الخير كله وإليك يرجع الأمر كله، اللهم صلّ على عبدك ونبيك محمد -صلى الله عليه وسلم- في الأولين والآخرين وفي كل وقتٍ وحين، أما بعد:

إخواني وأخواتي في الله ربنا يحفظكم ربنا يسدّدكم ربنا يفتح على أيديكم، اللهم استعملنا ولا تستبدل بنا يا رب، اللهم اجعلنا من أهل القرآن الذين هم أهلك وخاصتك، اللهم آمين.  
لا زلنا في الحلقة السادسة من تفسير سورة "ق" مع أكبر موسوعة قرآنية في الدار الآخرة وهي الصفحة الثانية من سورة ق، أكبر موسوعة قرآنية شاملة يا جماعة بتكلم عن كل مراحل الدار الآخرة.

**فيه موسوعات قرآنية متخصصة:**

سورة الرحمن: موسوعة قرآنية متخصصة في الكلام عن الجنة.  
خواتيم الأنبياء: موسوعة قرآنية متخصصة في الكلام عن جهنم.  
الجزء الثلاثين -زي سورة الانفطار والتكوير والانشقاق-: موسوعة قرآنية متخصصة في الكلام عن يوم القيامة.  
ولكن الصفحة الثانية من سورة "ق" موسوعة قرآنية شاملة، أكبر موسوعة قرآنية اتكلمت عن عدد المراحل في الدار الآخرة في صفحة واحدة وهذا من إعجاز القرآن.

**الخمس مراحل الأولى من الدار الآخرة:**

- الحلقة اللي فاتت يا إخواني خدنا خمس مراحل من العشر مراحل اللي الصفحة اتكلمت عنهم:
1. الاحتضار، "إِذْ يَتَلَقَّى الْمُتَلَقِّيَانِ عَنِ الْيَمِينِ وَعَنِ الشَّمَالِ قَعِيدٌ" ق:17، الملكين اللي مستنيين يستلموا الروح من ملك الموت بعد ما يخرجها، وصف مرعب للاحتضار.
  2. الموت، "وَجَاءَتْ سَكْرَةُ الْمَوْتِ بِالْحَقِّ ذَلِكَ مَا كُنْتَ مِنْهُ تَحِيدٌ" ق:19.
  3. البعث، لما ربنا -سبحانه وتعالى- يقول: "وَنُفِخَ فِي الصُّورِ ذَلِكَ يَوْمُ الْوَعِيدِ" ق:20.
  4. الحشر، "وَجَاءَتْ كُلُّ نَفْسٍ مَعَهَا سَائِقٌ وَشَهِيدٌ" ق:21، ازاي إن فيه اتنين بيقتادوا الإنسان في أرض المحشر.

5. العرض على الله، "وَقَالَ قَرِينُهُ هَذَا مَا لَدَيَّ عَتِيدٌ" ق:23، ده قرين الملائكة اللي بيشهد على الإنسان إنه ممكنش يسمع أي توجيه للخير، وبعد كده "قَالَ قَرِينُهُ رَبَّنَا مَا أَطْعَمْتُهُ وَلَكِنْ كَانَ فِي ضَلَالٍ بَعِيدٍ" ق:27، ده قرين الشياطين اللي بيلاقي نفسه هيترمى معاه في جهنم، وفي أحد الأقوال إن ده صاحب السوء، فيتفاجأ الإنسان إن كان فيه قرين ملائكة، وإن كان فيه قرين شياطين.

### صدمتين كهربيتين لقلوب الغافلين:

لحد هنا وقفنا يا جماعة عند قول الله: "وَمَا أَنَا بِظَلَّامٍ لِلْعَبِيدِ" ق:29، عند بدء نهاية العرض على الله، النهارده بإذن الله - سبحانه وتعالى - هناخد الخمس مراحل التانيين من الدار الآخرة في الصفحة الثانية من سورة "ق".

هنبدأ من أول قول الله: "يَوْمَ نَقُولُ لِجَهَنَّمَ هَلِ امْتَلَأَتْ وَتَقُولُ هَلْ مِنْ مَزِيدٍ" ق:30، هنبدأ بصدمتين كهربيتين، يعني مش صرخات للغافلين ده صدمات كهربائية لقلوب الغافلين.

أحياناً فيه واحد قلبه ضعيف محتاج مثلاً مقوي لعضلة القلب، ده واحد قلبه وقف محتاج صدمات كهربائية علشان ترجع الفطرة تنتفض تاني.

### 1. الصدمة الأولى:

"يَوْمَ نَقُولُ لِجَهَنَّمَ هَلِ امْتَلَأَتْ وَتَقُولُ هَلْ مِنْ مَزِيدٍ" ق:30، صدمة إن جهنم طلع كائن حي يا جماعة، جهنم أمام أرض المحشر كلها في وسط الخمسين ألف سنة بتوع يوم القيامة، جهنم تتكلم، جهنم ترد، وتتكلم كلام مليون غل، مليون غيظ، مليون حق على كل واحد تجراً على حدود الله، وعلى كل واحدة انتهكت حرمت الله "وَتَقُولُ هَلْ مِنْ مَزِيدٍ" كمان يا رب كمان.

وكلمة مزيد دي كلمة خطيرة جداً في سورة ق؛ لأنها جت مع النار "هَلْ مِنْ مَزِيدٍ"، وجات مع الجنة "وَلَدَيْنَا مَزِيدٌ" ق:35، اللي كان مشغول بالزيادة في الدنيا والزيادة في الشهوات راح فين في النهاية، اللي كان مشغول في الزيادة في الدين والترقي في دين الله كسب قد ايه في النهاية.

"يَوْمَ نَقُولُ لِجَهَنَّمَ هَلِ امْتَلَأَتْ" يعني ايه يوم يا جماعة؟ كإن ربنا اختصر اليوم ده كله في لحظة واحدة بس ساعة العرض على الله، بعض المفسرين قال لما يبجي ناس كتير تدخل جهنم فيحصل ازدحام على باب جهنم، ازدحام يعني الناس بتتكرس على بعض على باب جهنم.

فينظر اللي واقفين يُعرضوا على الله لما يُحكم عليهم بالنار إلى جهنم فيعتقدوا إن جهنم اتملت خلاص، فتبدأ الفرحة تيجي في قلوبهم إن خلاص حتى لو حُكم عليهم بالنار امتلأت النار بالمعذبين فلم يعد هناك مكان في النار، في هذه اللحظة يلتفت الله إلى جهنم وينظر الله إلى جهنم - سبحانه وتعالى -، "يَوْمَ نَقُولُ" ويوم دي كإن اللحظة دي كفاية،

يعني يقولك مثلاً يوم العيد، ايه يوم العيد ده؟! ده يوم ما رئيس الجمهورية بينزل يسلم على الناس بنفسه، يبقى كإن اللحظة دي مهمة لدرجة إنها بقت علم على اليوم، اللحظة دي خطيرة لدرجة إنها بقت علم على يوم القيامة. ينظر رب العزة إلى النار فيقول: "يَوْمَ نَقُولُ لِجَهَنَّمَ هَلِ امْتَلَأَتْ" ده شيء مرعب جداً يا جماعة، الله يكلم النار والكل بينظر، هو جهنم هتردد؟! هي جهنم أصلاً ينفع ترد؟! دي نار دي حريقة، هو فيه حريقة بتتكلم؟! "وَتَقُولُ هَلْ مِنْ مَزِيدٍ" الواو الثانية دي واو عاطفة يعني ويوم تقول هل من مزيد، كإنه عُرف يوم القيامة بأنه اليوم الذي ستتكم فيه جهنم فتقول هل من مزيد.

"وَتَقُولُ هَلْ مِنْ مَزِيدٍ" هنا يقنط أهل الباطل والعياذ بالله، "هَلْ مِنْ مَزِيدٍ" يعني ده اللي متكرسين على الباب كلهم ليهم مكان، وكمان يا رب، كمان كل واحد عصاك، كمان كل واحد تجراً على حرمتك، كمان كل واحد اجترأ على حد من أوليائك، كمان كل واحد نحي شريعتك عن الحياة، كمان كل واحد قال فصل الدين عن الدولة، كمان كل واحدة تجرأت وتبرجت وفتنت المسلمين، كمان كل واحد بارزك بالكبائر، كمان كل واحد أكل حرام أو تجرأ على حرام، كمان يا ارب، كإن جهنم جواها كمية غل رهيب وغيظ رهيب من كل من عصى الله - سبحانه وتعالى -، دي أول صدمة كهربائية بنبدأ بيها، إن جهنم طلعت كائن حي بيتكلم ويحس ويغتاز ويحلق.

## 2. الصدمة الثانية:

"وَأُزْلِفَتِ الْجَنَّةُ لِلْمُتَّقِينَ غَيْرَ بَعِيدٍ" ق:31، إنتم عارفين الساونا لما الواحد بيدخل في أوضة عاملة زي الفرن كده مولعة نار لحد ما يبقى جسمه عامل زي ما بينصهر وبعد كده يقوموا واخذينه راميينه في حمام متلج، حمام ساقع في عز الشتا، تحس إن قلبك كإنه بيتعرض لعملية رهيبة. الأول جهنم وانفزع في آية جهنم، وبعد كده "وَأُزْلِفَتِ الْجَنَّةُ لِلْمُتَّقِينَ" جت اللحظة اللي كل الصالحين مستنيينها، صبر السنين وصبر العمر كله.

"وَأُزْلِفَتِ الْجَنَّةُ" مشهد عاطفي يزلزل القلب يا إخواننا، اتنين حبايب بيحروا على بعض هو بيحري على الجنة وهو مشتاق لها، والجنة بتحري عليه، الجنة بتقربله، الجنة مش بس بتتزين ومستنياه، ده الجنة بتزلف من كتر شوقها للصالحين، من كتر شوقها للصوامين القوامين، من كتر شوقها لكل من جاهد في سبيل الله، من كتر شوقها للناس اللي عاشت علشان ربنا وبس، من كتر شوقها للمتقين المحسنين، الجنة هي اللي بتقرب ليهم، دي الصدمة الكهربائية الثانية.

الجنة طلعت كائن حي بيحب وبيشتاق وبيقرب، المنظر مهول يا إخواننا، والاتنين اللي بيحبوا بعض قوي وواحشين بعض قوي بيحروا على بعض وبيقربوا من بعض، "وَأُزْلِفَتِ الْجَنَّةُ" الجنة كلها بما فيها بتقرب من الصالحين، وبتقرب علشان تقولهم خلاص يلا اجروا، يلا معدش غير حاجة بسيطة وتبقوا من أهلي وتسكنوا في وتبقوا من سكاني.

"وَأُزْلِفَتِ الْجَنَّةُ لِلْمُتَّقِينَ غَيْرَ بَعِيدٍ" أزلفت: يعني قربت، وغير بعيد: يعني قربت، طيب ايه الفرق يا جماعة؟ أزلفت مكان، الجنة نفسها بتقرب في المكان، إنما غير بعيد ده زمان، خلاص معدش فيه بينكم وبين فترات طويلة. أحياناً الواحد يا إخواننا لما بيعجي يتشوق لآيات الجنة ويفكر فيها يفهم فعلاً يعني ايه "الدنيا سجن المؤمن..". صحيح مسلم.

طيب الواحد يموت ازاي يا رب؟ طيب الواحد ينال الشهادة ازاي يا رب علشان يدخل الجنة على طول؟ ما هو الواحد لو مات مودة عادية ما هو مش هيدخل الجنة على طول إلا أن يشاء الله، ما هو هيدخل القبر وحساب الملكين وحياة البرزخ، إنما اللي بيدخل الجنة على طول اللي مات شهيد، طيب الواحد يعمل ايه؟

الواحد ساعتها يفهم يعني ايه فعلاً "الدنيا سجن المؤمن.."، يعني ايه إن الواحد مسحون ومش مصدق امتي هيجي قرار الإفراج، "وَأُزْلِفَتِ الْجَنَّةُ" ده القرب المكاني، "لِلْمُتَّقِينَ غَيْرَ بَعِيدٍ" ده القرب الزماني.

خلاص معدش فيه آلام الانتظار، معدش فيه آلام الشوق، معدش بيني وبينكم يوم قدره خمسين ألف سنة يوم القيامة، ولا حياة برزخية ولا دنيا لازم تموتوا علشان تدخلوني.

"غَيْرَ بَعِيدٍ" خلاص يا إخواننا احنا في اللحظات الأخيرة ليوم القيامة دلوقتي، احنا في التشطيبات النهائية ليوم القيامة دلوقتي.

الشروط الأربعة لدخول الجنة:

"هَذَا مَا تُوعَدُونَ لِكُلِّ أَوَّابٍ حَفِيفٍ" ق:32، "هَذَا مَا تُوعَدُونَ" كإن الجنة بدأت تقرب قوي، فربنا يقولهم: "هَذَا مَا تُوعَدُونَ" بس لسه، مش أهل الجنة بس اللي واقفين، على فكرة يا جماعة احنا مش في النهاية النهائية خلاص ليوم القيامة، ده احنا لسه هتفاجأ إن لسه فيه مراحل جاية، بس ركزوا معايا جدًّا في المراحل اللي جاية دلوقتي.

"هَذَا مَا تُوعَدُونَ لِكُلِّ أَوَّابٍ" كإن البشرية كلها لسه واقفة والجنة بدأت تقرب فبدأت الناس كلها تتلهف على الجنة، وربنا يقولهم استنوا دي مش للجميع، دي فيه أربع شروط لدخولها، كل اللي حقق الأربع شروط هيدخلها.

وأنا قتلتم إن لفظ "كل" ده في سورة ق لفظ خطير جدًّا، "وَجَاءَتْ كُلُّ نَفْسٍ" ق:21 مفيش حد هيفلت من يوم القيامة، وربنا -سبحانه وتعالى- يأتي بلفظ "كل" في سورة ق للدلالة على إن مفيش حد هيفلت، "كُلُّ كَذَّابٍ الرَّسُلَ فَحَقَّ وَعَيْدٍ" ق:14 محدش هيفلت من الأثر الدنيوي للمعصية، كل من عصى إلا أن يتوب الله عليه "هَذَا مَا تُوعَدُونَ لِكُلِّ أَوَّابٍ حَفِيفٍ".

كل اللي اشتغل هياخد النهارده، بس كل اللي حقق الأربع شروط:

1. أواب. 2. حفيظ. 3. خشى الرحمن بالغيب. 4. جاء بقلب مئيب.

هنقف مع الشروط دي دلوقتي بإذن الله وقفة مهمة قوي، ووقفة ممتعة قوي، ووقفة إن شاء الله مثمرة في حياتنا قوي يا جماعة، ولكن نقف الأول مع "هَذَا مَا تُوعَدُونَ" وهم واقفين كده والجنة قدام عينيهم تسحر العيون وربنا يقولهم: "هَذَا مَا تُوعَدُونَ" لكل اللي حقق الشروط الأربعة لدخول الجنة.

أنا متخيل حال أهل الجنة يا جماعة في اللحظة دي وهم قاعدين بيصوا بانبهار كده، ده جبريل لما شافها فيقول لربنا: **"..وَعَزَّتْكَ لَا يَسْمَعُ بِهَا أَحَدٌ إِلَّا دَخَلَهَا..."** صححه الألباني، لا يسمع بس، لا يسمع مش لا يرى!!.

يا رب ده لو تمنها إن الواحد يقتل نفسه هيقتل نفسه، ده لو تمنها إن الواحد يفني عمره كله، هيفني عمره كله يارب علشانها، سيدنا جبريل لما شافها بُهر.

العاصي لما بيشفها يوم القيامة فيقعد يقول يا رب قربني بس، يارب قربني، لسه مش من الجنة لأ، من شجرة ونبع جنب الجنة، ربنا يقربّه، ربنا بعد كده يورّيه شجرة ونبع أجمل، يا رب قربني بس، يقربّه، وبعد كده يبدأ يسمع أصوات الجنة مش يشوف من جوا يسمع الأصوات بس، فيقول يا رب أدخلني الجنة، يبدأ بقى يتوسل إلى الله.

النبي -صلى الله عليه وسلم- بيعلق تعليق يقطع القلب يا جماعة، يقول: **"..وَرُبُّهُ يَعْرِضُهُ لِأَنَّهُ يَرَى مَا لَا صَبْرَ لَهُ عَلَيْهِ..."** صحيح مسلم، ده بيشف حاجة مفيش إنسان يقدر يتمالك نفسه قدامها، تخيل إنت بقى لما تشوف الجنة، تخيلي إنت في اللحظة دي.

**لماذا لم تتغير أسماء الأشياء التي في الجنة عن أسماء الدنيا رغم تغير طبيعتها؟؟**

**"هَذَا مَا تُوعَدُونَ"** ساعات الواحد يتساءل يا جماعة هو ليه ربنا خلّى أسماء الجنة زي أسماء الدنيا؟ يعني الجنة فيها تفاح رغم إن ملهوش أي علاقة بطعم تفاح الدنيا، ولا شكله، ولا لونه، الجنة فيها المانجو، الجنة فيها البلح، الجنة فيها التين، الجنة فيها العنب، الجنة فيها القصور، ده اسمه قصر رغم إن ملهوش أي علاقة بشوية الطوب الأحمر اللي اتدهنوا بأي لون كده واتحط فوقهم شوية قماش اسمهم ستاير واتسموا قصر ولا فيلا. قصور الجنة دي شيء تاني خالص، من ياقوتة حمراء أو زبرجدة خضراء أو درة بيضاء، شيء تاني خالص يا جماعة.

طيب ليه ربنا ساب الأسماء؟ طيب ما كان مادام كل حاجة حقيقتها تغيرت كانت الأسماء تتغير؟ لأ علشان لما يدخل الجنة يقولهم أنا عايز تفاح، خد التفاح أهو، ايه ده؟؟ ده التفاح، ده تفاح منين ده مفيش أي علاقة بينه وبين شكل التفاح في الدنيا!!، طيب دوق بس، يبجي يدوق يلاقي الثمرة بتفتق عن سبعين طعم. يقول ايه ده!!؟ يا ندمي على كل لحظة ضيّعتها من عمري علشان اللي كان اسمه تفاح في الدنيا، يا ندمي على كل لحظة ضيّعتها من عمري علشان اللي كان اسمه قصر في الدنيا، يا ندمي على كل لحظة ضيّعتها في عمري علشان اللي كان اسمها فواكه في الدنيا، دي طلعت الدنيا دي فشكك، دي طلعت الدنيا دي مفيش خالص.

فبقيت الأسماء؛ ليتذكر أهل الجنة إن الدنيا مكنش ليها أي قيمة بالنسبة لنعيم الجنة.

**"هَذَا مَا تُوعَدُونَ لِكُلِّ أَوَّابٍ حَفِيفٍ \* مَنْ خَشِيَ الرَّحْمَنَ بِالْغَيْبِ وَجَاءَ بِقَلْبٍ مُنِيبٍ" ق 33:32**

هنا يا جماعة 3 صدمات كهربائية:

الصدمة الأولى: إن النار طلعت كائن حي.

الصدمة الثانية: إن الجنة طلعت كائن حي بتقرّب من المتقين **"وَأُزْلِفَتِ الْجَنَّةُ لِلْمُتَّقِينَ غَيْرَ بَعِيدٍ"**.

**الصدمة الثالثة:** فاكرين الحلقة اللي فاتت لما خدنا الصدمة الكهربائية الثالثة، إنّ وهو واقف في العرض على الله يُفاجأ إنّ كان فيه قرين من الملائكة ملازمه بيأمره بالخير، وإن كان فيه قرين من الشياطين ملازمه بيأمره بالشر، ربنا كان عاين لكل إنسان ملك يوجهه للخير، وإبليس معاين لكل إنسان شيطان يوجهه للشر، ويُفاجأ إن الموضوع كبير وإن فيه سائق وشهيد وإن الموضوع كان خطير، صدمة كهربائية جبارة.

### ماهو سلّم الهبوط وسلّم الصعود؟

وفي وسط التلات صدمات الكهربائية دي، يبجي حدث خطير جداً في الآيات، ولازم تركزوا معايا كويس جداً جداً جداً في الكلام اللي هقوله اللي جاي بإذن الله - سبحانه وتعالى - يا إخواني؛ لأن الكلام ده هيفهمنا حاجات كثير جداً في الحياة.

في وسط الصدمات الكهربائية التلاتة ربنا يجيب لينا سلّمين:

سلّم الهبوط وسلّم الصعود، سلم الانتكاس وسلم الترقّي والزيادة، سلّم بيفسر إزاي الإنسان بينهار ويضيع ويكفر، وسلّم بيفسر الإنسان إزاي بيترقّي ويصل إلى أعلى المقامات وأعلى الدرجات.

السلّمين دول جاينين وسط الصواعق الكهربائية ووسط الصرخات للغافلين، ده ايه؟ علشان نتلقّاهم بأعظم ما يكون من فتح القلب لهاتين الحقيقتين، سلّم الهبوط وسلّم الصعود، إيه سلّم الهبوط؟ وإيه سلّم الصعود؟

### سلّم الهبوط

"أَلْقِيَا فِي جَهَنَّمَ كُلَّ كَفَّارٍ عَنِيدٍ" ق:24، "كُلٌّ" مفيش حد هيفلت، استنوا بقى، وبعد كده ربنا بيقول إن هو موصلش للكفر كده مرة واحدة، ده الكُفر ده وصلّه واحدة واحدة، فضل ينزل سلّمة سلّمة.

شوفوا التفسير "مَنَاعٍ لِلْخَيْرِ" ق:25 كانت دي البداية، البداية ماكانتش الكُفر، البداية ماكانتش العلمانية، البداية ماكانتش إن هو كره شريعة ربنا، البداية ماكانتش إنه حارب أولياء الله، البداية كانت "مَنَاعٍ لِلْخَيْرِ"، وبعد كده بقى "مُعْتَدٍ" نزل أكثر، وبعد كده بقى "مُرِيبٍ" نزل أكثر، وبعد كده "الَّذِي جَعَلَ مَعَ اللَّهِ إِلَهًا آخَرَ" ق:26 نزل أكثر، يعني ايه؟؟؟

"مَنَاعٍ لِلْخَيْرِ" القصة بدأت إن كان في إيده خير كره إنه يدّي الخير ده للناس، كره إنه يفيد الناس بحاجة، كره إنه يتصدق، كره إنه يزكي، بقى "مَنَاعٍ لِلْخَيْرِ" فنزل وبقى "مُعْتَدٍ"، يعني كان الأول خايف على الخير اللي في إيده، "مُعْتَدٍ" بقى طمعان في الخير اللي في إيد الناس، بقى بياكل حرام علشان ياخذ الخير اللي في إيد الناس، بقى بيتجرأ على المخلوق بقى بيتجرأ على خلق الله، بعد كده نزل أكثر وبقى "مُرِيبٍ" بقى شاكك في الدين وشاكك في الحق، يعني انتقل من الجرأة على المخلوق إلى الجرأة على الخالق إلى الجرأة على الله، بقى مريب، بقى بيشك في الدين، بعد كده نزل أكثر "الَّذِي جَعَلَ مَعَ اللَّهِ إِلَهًا آخَرَ" خلاص أشرك وكفر والعياذُ بالله، ده اسمه سلم الهبوط يا جماعة.







أنا حسيت يا إخواننا إنَّ أنا دماغي هتتفجر بعد الليلة المباشرة دي، حسيت إيه يا إخواننا، احنا طيار بدون خط سير، حسيت إن الجميع مشحون، الكل الأخوات متصلين بيّ احنا مُنتقبات وكنا لابسين بيشة ولا بسين جوانتي اشتغلنا في الاستثمار دلوقتي خلاص البيشة بدأت تقع، الجوانتي بدأ يقع، الاختلاط بدأ يبجي، معدش فيه صلاة فجر، طيب نرجع ازاي؟ مش عارفين، ايه يا إخواننا ده!!

المتزوجة طيب أنا دلوقتي عايزة أحفظ قرآن ومش عارفة أجمع ما بين حقوق بيتي وزوجي وما بين بنائي في الدين وديني أجمع ازاي؟ مش عارفة، حسيت إن إحنا طيار مشحون وخلاص قاعدين نكلم الناس عن الجنة والنار والجنة والنار والآخرة والعظمة وفي النهاية طيب نعمل إيه؟؟؟ طيب نوصل ازاي؟ سخّنتونا، أدونا خط سير بقى، أدونا رويشات.

علشان كده لما بكلمكم عن سلم الصعود وسلم الهبوط، اوعى يكون قلبك وإن بتسمعي بتكلم عن الصدمات الكهربائية بتاعة إن جهنم طلعت كائن حي والجنة طلعت كائن حي، اوعى يكون حماسك في الجزء ده أكثر من حماسك وأنا قاعد أكلمك عن سلم الصعود وسلم الهبوط علشان تفهم توصل لربنا إزاي، علشان تفهم قواعد النجاح في الحياة وقواعد النجاح في الدين شكلها إيه.

عايزين نركز يا جماعة، عايزين يبقى عندنا خط سير، اللي هقوله ليكم دلوقتي ده رويشة ازاي أصلح قلبي؟ ازاي أتخلص من المعاصي، ازاي أخلص من معصية السر اللي مدمرة لي حياتي؟ ازاي تيجي المقامات الإيمانية في قلبي؟

### رويشة ————— كيفية إصلاح القلب

اسمعوا الكلام العملي بقى، اسمعوا كلام القرآن بقى.

"هَذَا مَا تُوعَدُونَ لِكُلِّ":

1. "أَوَابٍ" أوَّابٍ يعني له أوراد عبادة يؤوب بها إلى الله، له أوراد عبادة مستمرة، ورد قيام ليل مستمر، ورد جلسة ضحى مستمر، ورد قرآن مستمر، له أوراد عبادة يؤوب بيها إلى الله - سبحانه وتعالى-، له عمرة سنوية بيعملها كل سنة، اعتكاف رمضان بيعتكف كل سنة، عشر ذي الحجة ييملأ الدنيا ذكر لله فيهم كل سنة. "أَوَابٍ" له أوراد عبادة يومية أو أسبوعية أو شهرية أو سنوية مستمرة، يبقى ده "أَوَابٍ"، يبقى "أَوَابٍ" دي اللي هي الورد، له أوراد، يبقى أول كلمة، كلمة عملية "أَوَابٍ"

### وردك قبل قلبك

وآخر كلمة "أَوَابٍ حَفِيزٌ \* مَنْ خَشِيَ الرَّحْمَنَ بِالْغَيْبِ وَجَاءَ بِقَلْبٍ" آخر كلمة القلب، أول كلمة أوَّابٍ "الورد" وآخر كلمة القلب عكسنا تمامًا، علشان تعرفوا احنا فاشلين ليه، كان المتوقع "هذا ما توعدون لكل من جاء بقلب منيب وصار أوَّابٍ"؛ لأن احنا معتقدين مش هقدر أثبت على العبادة إلا لو عندي قلب.

أقابل الأخ أنا مقدرش أشتغل في الدعوة إلا لو لقيت قلبي، أخ تاني معرفش أحضر الدروس إلا لو لقيت قلبي، أخ تالت مش مستمر على قيام الليل علشان مش لاقى قلبي، يادي المصيبة يادي المصيبة على الفكر اللي ودانا في داهية.

العلماء سموا اللي ماسك قلبه ده واللي ماسكة قلبها وبتقول مش هقدر أعمل حاجة في الدنيا إلا لما ألقى قلبي سموا ده **عابد الحال**، واحد مش بيعبد ربنا ده بيعبد لذة العبادة جوا قلبه، ده بيعبد اللذة، ده بيعبد لذة الإيمان جوا قلبه مش بيعبد الله.

فالأية جابت الأول **وردي قبل قلبي**، قبل **كيف حال قلوبكم مع الله؟ كيف حال أوراكم مع الله؟** حال وردك إيه؟ أنا تخيلت يا إخواننا والله وأنا ماشي امبارح في الشارع بتخيل كده اللهم لك الحمد اللهم لك الحمد الواحد لو كان لقي مر بي كده، أو لقي حد وهو طالب يفهمه الكلام ده، يفهمه إن ماتراقبش قلبك راقب وردك، ولو استمرت على وردك **القلب هيجي**.

اقعدني قومي الليل شهرين وإن مش لاقية قلبك هتلاقي قلبك هيجي في آخرهم، اقعد جلسة الضحى ست شهور وإن مش لاقية قلبك قلبك هيجي، كلام عملي، الانتقال من الفكر المشاعري "فكر قلبي" إلى الفكر العملي "فكر وردي".

يبقى أول حاجة **"هَذَا مَا تُوعَدُونَ لِكُلِّ أَوَّابٍ"**، **"أَوَّابٍ"** له أورااد عبادة ثابتة مستمرة.

2. **"حَفِيزٌ"** يعني بيحفظ حدود ربنا مايقعش في المعاصي، يبقى امتي جه البعد عن المعاصي؟ لما جت الطاعات الأول لما جت **"أَوَّابٍ"** الأول.

3. **"مَنْ خَشِيَ الرَّحْمَنَ بِالْغَيْبِ وَجَاءَ بِقَلْبٍ مُنِيبٍ"**، **"مَنْ خَشِيَ الرَّحْمَنَ"** الخشية دي مقام قلبي، **"وَجَاءَ بِقَلْبٍ مُنِيبٍ"** والإنباء مقام قلبي، يبقى الآيات الأول جابت الورد العملي ورد العبادة اللي هو **"أَوَّابٍ"**، وبعد كده جابت البعد عن المعاصي اللي هو **"حَفِيزٌ"**، وبعد كده جت المقامات الإيمانية اللي هي الخشية والإنباء، الترتيب الخطير ده تخرجوا منه بإيه؟ ناخذ الفاصل ده ونرجع بعدها أقولكم تخرجوا منه بإيه؟

**"هَذَا مَا تُوعَدُونَ لِكُلِّ أَوَّابٍ حَفِيزٌ \* مَنْ خَشِيَ الرَّحْمَنَ بِالْغَيْبِ وَجَاءَ بِقَلْبٍ مُنِيبٍ"** يبقى قلنا يا جماعة هنا كذا حاجة، أول حاجة إن الورد جه قبل القلب، يبقى لازم تفكري في وردك، اوعي تفكري إن قلبك هينصلح إنك تسمعي دروس عن الإخلاص، ودروس عن التوكل، ودروس عن اليقين، قلبك هينصلح بالعبادة، قلبك هينصلح بالعمرة، بالاعتكاف، بقيام الليل، بجلسة الضحى، بالسنة والرواتب، بتكبيرة الإحرام، بورد القرآن، بلبس حجاب أمهات المؤمنين، بإنك إنت يبقى هدّيك الظاهر زي النبي -عليه الصلاة والسلام-، قلبك هينصلح بالعبادة يا إخواننا، بالعبادة ثم السماع عن المقامات الإيمانية.

**لو دخلت الطاعة من الباب .. هربت المعصية من الشباك**

الحاجة الثانية إن **"أَوَّابٍ"** جت قبل **"حَفِيزٌ"**، يعني العبادة جت قبل ترك المعاصي، يبقى لو دخلت الطاعة من الباب هربت المعصية من الشباك، كلام خطير جداً، كلام خطير جداً للي قاعد منكم معذب دلوقتي لأنه يقع في معاصي ومش عارف يعمل إيه؟





المنهجية إزاي؟ المنهجية زي سورة البلد كده ربنا يقول: **"فَلَا أَفْتَحَمَ الْعَقَبَةَ"** البلد:11، يلا اقتحم، يلا ارم نفسك بلا روية، يلا اصعد الجبال، هو ده المعنى اللغوي الجذري لكلمة **"فَلَا أَفْتَحَمَ الْعَقَبَةَ"** يلا لتتھيا لصعود الجبال.

**"وَمَا أَدْرَاكَ مَا الْعَقَبَةُ"** البلد:12، كان المتوقع بقى العقبة هي الجهاد في سبيل الله، **"فَكَ رَقَبَةٍ \* أَوْ إِطْعَامٌ"** البلد 14:13 تجيب وجبة **"فِي يَوْمٍ ذِي مَسْغَبَةٍ \* يَتِيمًا ذَا مَقْرَبَةٍ \* أَوْ مِسْكِينًا ذَا مَتْرَبَةٍ"** البلد 16:14، إيه يارب ده؟! **"الْعَقَبَةُ"** إن أنا أطعم الطعام وأعمل شوية عبادات؟! ده أنا كنت متوقع بقى الكلمة هتيجي رهيبه.

استنى بس استنى، **"ثُمَّ كَان"** البلد:17، ثم هنا ممكن تفيد الانتقال الرئبي، ثم دي يعني اترقى بقى، **"ثُمَّ كَان مِنَ الَّذِينَ آمَنُوا"** لما عمل العبادات رسخ الإيمان في قلبه ف **"كَانَ مِنَ الَّذِينَ آمَنُوا وَتَوَاصَوْا بِالصَّبْرِ"** وبدأ يشتغل في الدعوة إلى الله وبدأ ينطلق في الواقع.

يعني الدين مايبجيش قفش يا جماعة، الدين بيجي لما بيكون عندنا منهجية، لازم يبقى فيه منهجية، نبدأ بالعبادات والأوراد، وبعد كده التوبة النصوح من المعاصي، وبعد كده تبدأ تيجي المقامات، يبقى قبول المنهجية.

### معنى كلمة "أواب"

الكلمة اللي أنا عايز أقف معاها على عجالة هنا كلمة **"أواب"**، كلمة **"أواب"** يا جماعة الأيبة، لأن فيه ناس كثير معتقدة إن **"أواب"** يعني كلما عصى عاد إلى الله، ياعم ده ربنا وصف الأنبياء بأنهم أوابين، هم الأنبياء كانوا بيعصوا كثير قوي وبيتوبوا كثير قوي من المعصية!!

يا إخواننا الأيبة هي أن ترد الإبل الماء كل ليلة، كل ليلة، يعني الأواب هو الذي يرد العبادة كل يوم، كل يوم. علشان كده عبيد بن عمير يقول: **"الأواب هو الذي لا يقوم من مجلسه"**، يعني لما يبقى له ورد ساعة قبل الفجر لو حصل زلزال مش هيسيب سجادة الصلاة، اللي له ورد جلسة الضحى لو واحد جه قاله فيه صفقة بمليون جنيه مش هيسيب جلسة الضحى، هو ده الأواب الذي له أوراد عبادة مقدسة يجاهد فيها، هو ده الأواب.

### أمثلة من الأوابين من الخلق والنبين

فيه أخ في القاهرة تاجر ليه ورد كل يوم من المغرب للعشاء في الجامع، لو جاله صفقة بمليون جنيه مايقمش من الجامع، هو ده الأواب، زي سيدنا سليمان ربنا قال: **"إِنَّهُ أَوَّابٌ"** ص:30، ليه؟ لما الورد بتاعه جه عشرين ألف خيل شغلته عنه يا دجهم يا إما تبرع بيهم في سبيل الله وخرجهم من ملكيته، هو ده الأواب، اللي عنده ورد مقدس جهادي يومي هو ده الأواب يا جماعة.

علشان كده ابن تيمية يقول على الورد اليومي بتاعه، بعد الفجر كان يقعد يقرأ الفاتحة من الفجر لحد تسعة الصبح كده أو عشرة الصبح يقول: **"هذه غدوتي فإن لم أتغدها سقطت قوتي"**، لو أنا معملتش ورد قوتي على غض البصر تنهار، قوتي على الدعوة إلى الله تنهار، قوتي على قلة النوم علشان أصحى في عز البرد لقيام الليل تنهار، قوتي على إن أنا أتعامل مع الناس بالأخلاق تنهار، قوتي على السهر في طلب العلم تنهار.



مستني قلبي علشان أشتغل في الدعوة، يا ابني اشتغل هتروح جهنم، مستني قلبي علشان أثبت على العبادة، يا ابني أثبت مش هتترى من غيرها، مستني قلبي علشان أطلب العلم، مستني قلبي علشان أتعامل مع الناس بالأخلاق، مستني قلبي، إيه ده؟ إيه عبودية الحال اللي كثير من الملتزمين فيها دي؟! يبقى فكر وردى، من النهارده فكرنا كُننا فكر وردى.

### تجميع القواعد الثمانية للنجاح في الحياة

يبقى 8 قواعد للنجاح في الحياة تفتكروهم معايا بسرعة كده ها

ثلاثة من سلم الهبوط هم إيه؟

1. التشخيص المبكر للانتكاس.
2. الوقفة اللازمة، لما اللبنة الحمراء تنور، لما دينك يبدأ ينهار، قف علشان دينك زي ما بتقف علشان دينتك.
3. فقه التحصيل، لازم تعرف الشيطان بيدخلك مين، من أي نقطة هتتأثر فيها.

وثلاث حاجات تانيين خدناهم من سلم الصعود:

1. قبول الترقى والطموح الديني المتزايد الذي لا يتوقف.
  2. بعد قبول الترقى قلنا إيه؟ قبول التدرج.
- يبقى قبول الترقى التدريجي، وعدم الطمع في الدين، وعدم الرغبة في قفزة مفاجئة، لأ، اقبل السلم واحدة واحدة، بلاش المثالية اللي مضيعانا دي، كفاية فشل بقى، اقبلوا الواقع مفيش حد بيطلع غير كده.
3. قبول المنهجية.

أنك لن تصل إلى الله إلا لما يبقى ليك منهج، وزي ما قلنا في سورة البلد كده فيه منهج، ربنا قال: "فَلَا اقْتَحَمَ الْعَقَبَةَ" يعني اطلع السلم، اطلع السلم هتوصل في النهاية إنك تقتحم العقبة، بس اطلع السلم واحدة واحدة، يبقى قبول المنهجية، مفيش وصول إلى الله إلا بالمنهجية.

ده احنا كنا عاملين بحث خطير جداً في المعهد القرآني الدعوي على موقع الطريق إلى الله اسمه المنهجية في السير إلى الله من خلال الجزء الثلاثين، اللي يدخل على منتدى المعهد ويراجع البحث ده هيلقي فيه كلام خطير جداً على المنهجية في السير إلى الله في الجزء الثلاثين.

وقاعدتين للنجاح من كلمة "أواب"

وخدنا بعد كده لسه قاعدتين للنجاح من كلمة "أواب":

1. الاستمرارية، إن من غير استمرار على ورد مش هتوصل لحاجة ولا هتجني ثمرة حقيقية.

2. الانتقال من الفكر المشاعري إلى الفكر العملي، من فكر كيف حال قلبي إلى فكر كيف حال وِردِي، وبعد كده فِكر في قلبك.

الخوف من الله في الخفاء

"مَنْ خَشِيَ الرَّحْمَنَ بِالْغَيْبِ وَجَاءَ" وهو مش شايف ربنا خايف منه، وهو لوحده في الغيب ومحدش شايفه، ده المعنى الثاني اللي المفسرين قالوه، وهو في أوضة وقافل على نفسه ومفيش حد شايفه وخايف من ربنا، "وَجَاءَ بِقَلْبٍ مُنِيبٍ \* ادْخُلُوهَا بِسَلَامٍ ۗ ذَٰلِكَ يَوْمُ الْخُلُودِ" ق 34:33.

يبقى احنا الحلقة اللي فاتت خدنا خمس مراحل من مراحل الدار الآخرة، لحد دلوقتي في الحلقة دي خدنا مرحلتين النار والجنة، لسه 3 مراحل في الآيتين الجايين.

المرحلة الثامنة والتاسعة من مراحل الدار الآخرة

القنطرة الأولى والقنطرة الثانية

"ادْخُلُوهَا بِسَلَامٍ ۗ ذَٰلِكَ يَوْمُ الْخُلُودِ"، "ادْخُلُوهَا بِسَلَامٍ" أخيراً جت اللحظة بتاعة دخول الجنة، بس يعني إيه "بِسَلَامٍ" يا جماعة؟ لولا إن لسه فيه خطر بينهم وبين الجنة هيتقال كلمة "بِسَلَامٍ" ازاى؟؟ ماهو "بِسَلَامٍ" دي معناها إن فيه خطر بس بيتقالك إنت متخفش إنت هتعدى وتسلم.

هو لسه إيه بعد العرض على الله بيننا وبين دخول الجنة؟ لسه حاجتين، لسه القنطرة الأولى والقنطرة الثانية.

القنطرة الأولى اللي هي إيه؟ الصراط.

والقنطرة الثانية اللي هي قنطرة تخلص حقوق العباد.

يبقى لسه الصراط والقنطرة، يبقى دول من قبل الصراط والقنطرة بتقولهم "ادْخُلُوهَا بِسَلَامٍ" الجنة مزلفة أهى شايفين من بعيد الجنة بتقرّب، الواحد بيعدي من على الصراط وهو شايف الجنة، يعني تخيلوا ده حالة قلبه شكلها إيه؟ حماسه إنه يعدي شكله إيه؟ ليس بينه وبين الجنة إلا أن يعبر.

"ادْخُلُوهَا بِسَلَامٍ" إنتم عارفين بالظبط كده لما مثلاً مدرب عايز اللاعب بتاعه يلعب الماتش كويس يقوم المدرب يقف قدام اللاعب كده يقوله يلا يلا، هو عارف إن لما اللاعب هيشوفه ويشوف حماس المدرب اللاعب هيسخن، فالجنة كإها بتسخنه.

البشرى للمؤمنين قبل دخولهم الجنة

فالجنة كإها بتسخنهم، الجنة بتزلف وتقرّب وهم لسه هيعدّوا من على الصراط كإها بتقولهم يالّا عدّوا معدش بيني وبينكم غير الصراط والقنطرة وتدخولوني، يبقى كلمة "بِسَلَامٍ" قد ترجّح إن معناها إن لسه فيه أخطار.

طيب الكلام ده ليه شاهد من القرآن؟ آه في سورة الحديد، إيه في سورة الحديد؟ قول الله - سبحانه وتعالى -: **"بَشِّرَاكُمُ أَيُّومَ جَنَاتٍ"** الحديد:12، المفسرين قالوا أصلاً إن دول لسه ماعدشوش من على الصراط، الله!! يعني ربنا بيقولهم ألف مبروك على الجنة وهم لسه ماعدشوش من على الصراط!!؟

تخيل بقى إنت داخل لجنة الامتحان وعميد الكلية واقف على باب اللجنة بيقولك ألف مبروك، على إيه!!؟ يا ستي عميد الكلية قالك مبروك يعني ناجحة، من قبل الامتحان ناجحة، دول من قبل العبور من على الصراط بيتقال لهم ألف مبروك، من قبل الصراط والقنطرة خلاص إنتم بنحتوا، يالآ الجزء الباقي إنتم مبشرين إن إنتم هتعدوه.

**"ادخلوها بِسَلَامٍ"** يبقى شملت مرحلتين: القنطرة والصراط.

**"ذَلِكَ يَوْمُ الْخُلُودِ"** أهل الجنة حينما يدخلون الجنة يعلمون مما يرون من النعيم أن الحرمان من هذا النعيم بعد ما رأوه وذاقوه عذاب أشد من عذاب النار تخيلوا **"ذَلِكَ يَوْمُ الْخُلُودِ \* لَهُمْ مَا يَشَاءُونَ فِيهَا"** ق 34:35، يالاه الجنة، **"لَهُمْ مَا يَشَاءُونَ فِيهَا وَلَدَيْنَا مَزِيدٌ"**.

الفرق بين **"لَهُمْ مَا يَشَاءُونَ فِيهَا"** .. و**"لَهُمْ فِيهَا مَا يَشَاءُونَ"**

فيه مرة ربنا قال: **"لَهُمْ فِيهَا مَا يَشَاءُونَ"** الفرقان:16، وهنا **"لَهُمْ مَا يَشَاءُونَ فِيهَا"** ق:35، إيه الفرق بين لهم ما يشاءون فيها، ولهم فيها ما يشاءون؟؟ **"لَهُمْ فِيهَا مَا يَشَاءُونَ"** يعني تقلدتم "فيها" يفيد الاختصاص، إن اللي إنت عايزه مش موجود غير في الجنة، يعني إيه؟؟ يعني وفري عمرك وفروا عمركم يا ناس، ماتدوريش على السعادة برا الجنة مفيش سعادة براها، ماتدورش على الحب الحقيقي براها مفيش، ماتدوريش على المتعة واللذة براها مفيش.

حالة **"مَا يَشَاءُونَ"** دي مش موجودة غير فيها، ماتضيّعوش عمركم، اتعبوا علشانها ولما تدخلوها هترتاحوا هترتاحوا، زي اللي تقول لجوزها هو الجنة دلوقتي أنا مش هغير من الحور العين؟؟ يا ستي ادخلي وبعد كده أبشري مش هيبقى فيه مشاكل، هو مفيش في الجنة فسيخ؟؟ يا عم ادخل وبعد كده كل اللي نفسك فيه هتاخده بس ادخل، **"لَهُمْ فِيهَا مَا يَشَاءُونَ"** مفيش غير في الجنة.

هنا بقى **"لَهُمْ مَا يَشَاءُونَ فِيهَا"** طيب هنا في "ق" **"مَا يَشَاءُونَ"** جت الأول ليه؟ لأن هو ده اللي ضيّع الناس الغافلين اللي سورة ق بتعالجهم، **"مَا يَشَاءُونَ"** قُدّم ذكر المشيئة والرغبة، إن اللي ضيعهم إن هم رغبتهم اتحكمت فيهم، فربنا بيقولهم: **"لَهُمْ مَا يَشَاءُونَ"** كل الرغبات اللي إنتم عايزينها هتاخذوا أضعاف أضعافها في الجنة.

**"لَهُمْ مَا يَشَاءُونَ فِيهَا"** احلموا بالجنة، متعة إيه اللي في الدنيا!!؟ ده إنت بتحطي حنة اللحم ولا حنة الأكلة مهما كانت جميلة بعد 3 ثواني طعمها بيروح من بقك، الجنة بيظل الطعم مستمر في الفم قد إيه؟ يا إخواننا الجنة حاجة تانية.

"وإن الدار الآخرة لهي الحيوان" العنكبوت:64، "الحيوان" دي علماء اللغة قالوا على وزن الفعلان، قالوا إن الفعلان ده ما بيحيش غير اللهبان النار المتوهجة، الغليان المياه اللي بتغلي، الفوران الحاجة اللي بتفور، فقالتك الحيوان يعني الحركة الجبارة الحركة الجبارة، يعني حياة حقيقية يا جماعة، حياة مليانة متع مهولة يا إخواننا، حياة "لهم ما يشاؤون فيها ولدنا مزيد".

### المرحلة العاشرة من مراحل الدار الآخرة

"ولدنا مزيد" دي إحنا لحد دلوقتي خدنا 9 مراحل من الآخرة، دي الحاجة العاشرة "ولدنا مزيد" النظر لوجه الله النظر لوجه الله، "ولدنا مزيد" يعني زيادة على النعيم وزيادة على عملك، مفيش حديث في الدين كله بيقول من فعل كذا نظر إلى وجه الله؛ لأن لا يوجد عمل يكافئ إن يكون ثوابه إنك تنظر إلى وجه الله، علشان كده ربنا سمى النظر لوجه الله في القرآن "مزيد" وزيادة ليه؟ لأن مفيش عمل بيفسره "ولدنا مزيد".

"ولدنا مزيد" النظر إلى وجه الله يوم الجمعة في الجنة، يوم الجمعة لما يكشف الحجاب فينظر الجميع إلى وجه الله فيتمنون يوم الجمعة على كل نعيم الجنة، يعني يوم الجمعة ده يوحشهم من الأسبوع للأسبوع علشان يشوفوا ربنا، إنما السابقين يشوفوا ربنا غدواً وعشية مرتين في اليوم، وهناك من يبسح لهم الله النظر إلى وجهه، النظر لوجه الله ده درجات يا جماعة درجات.

"لهم ما يشاؤون فيها ولدنا مزيد" سبحان الله العظيم يعني كلمة "مزيد" دي ذكرت مع النار وذكرت دلوقتي مع الجنة، كلمة مزيد دي هي محور السورة أصلاً، إن السورة بتتكلم عن نموذجين:

1. واحد كان عايز يزيد في الدنيا، عنده طموح دنيوي جبار لدرجة إنه نسي الدين فضاع وانهار في سلم الهبوط.
2. وواحد كان قضيته الزيادة في الدين علشان كده جه سلم الصعود، يعني دلالة إن فيه ناس عندها طموح إيماني إنها تزيد، عايزة تزيد في الدين مهما كانت مشاكل الدنيا، فدلوا نعيم متزايد لا يتوقف.

"ولدنا مزيد" معنى جميل قوي قوي قوي، علشان كده الكلمة دي أنا بحس إنها محور السورة محور السورة، إنت عايزة تزيدي في الدنيا ولا عايزة تزيدي في الدين؟؟ اللي عايز يزيد في الدنيا في الآخر ماياخدش حاجة في الآخرة والعياذ بالله إلا لو كان موازن بين الدين والدنيا، اللي عايز يزيد في الدين في الآخرة بياخد نعيم "ولدنا مزيد".

### خصائص نعيم الجنة

"ولدنا مزيد" بتفتح لنا خصائص نعيم الجنة، خصائص نعيم الجنة 5 خصائص يا جماعة:

1. أنه نعيم متزايد متصاعد لا يتوقف عند درجة لذة معينة، على طول النعيم في تزايد وتصاعد، يعني مش أول يوم في الجنة الواحد منبهر وبعد كده يبدأ يبقى يتعود لاه ده النعيم متزايد على طول.

2. أن هذا النعيم متنوع، يعني تلاقوا مثلًا سورة الطور بتتكلم عن الحياة الاجتماعية في الجنة، سورة الرحمن بتتكلم عن النعيم المادي في الجنة، نعيم متنوع أصناف مهولة.
3. أنه نعيم إبداعي، يعني ايه إبداعي؟ يعني ثمرة الفاكهة الواحدة فيها 70 طعم، المانجاية فيها 70 طعم!! والمانجاية اللي بعدها 70 طعم تانيين!! وطعوم ثمار المانجو غير طعوم ثمار التفاح، نعيم إبداعي.
4. أنه نعيم متجدد، يعني ايه متجدد؟ يعني كل يوم جمعة لما بينظروا لوجه الله ربنا بيجددهم الجنة كلها بأصناف النعيم اللي فيها، يعني كل أسبوع فيه أصناف نعيم لم يروها من قبل أصلًا، نعيم متجدد.
5. أنه نعيم مثير، "يُفَجِّرُونَهَا تَفْجِيرًا" الإنسان:6، "يَتَنَازَعُونَ فِيهَا كَأْسًا" الطور:23، نعيم مليون إثارة، مليون مفاجآت، نعيم يا جماعة، نعيم حقيقي، نعيم جبار يا إخواننا.

"وَلَدَيْنَا مَزِيدٌ" النظر لوجه الله، سبحان الله يعني جه هنا في سورة ق في عام الحزن، وجه في سورة الأعراف اللي نازلة في شعب أبي طالب "وَكَلِمَةُ رَبِّهِ قَالَ رَبِّ أَرْنِي أُنظُرُ إِلَيْكَ" الأعراف:143، وجه في سورة القمر اللي نازلة في شعب أبي طالب برضه "إِنَّ الْمُتَّقِينَ فِي جَنَّاتٍ وَنَهَرٍ \* فِي مَقْعَدِ صِدْقٍ عِنْدَ مَلِكٍ مُّقْتَدِرٍ" القمر 54:55.

كإن النظر لوجه الله مايجيش غير في اللحظات الحرجة، غير في الأزمات العاصفة، كإن النظر لوجه الله المفروض يبقى دافع جبار من أجل العمل الصالح، ومن أجل الصبر، ومن أجل الثبات.

#### إعجاز الصفحة الثانية من سورة ق

يبقى خدنا 10 مراحل في الدر الآخرة في هذه الصفحة، ايه هم؟؟

1. الاحتضار.
2. الموت.
3. البعث.
4. الحشر.
5. العرض.
6. النار.
7. الجنة.
8. الصراط.
9. القنطرة.
10. النظر لوجه الله الكريم.

حاجة مهولة حاجة جبارة إن صفحة شملت هذا الفكر كله، وسلّمين للترقي، و8 قواعد للنجاح في الدين والحياة، و3 صواعق كهربائية تنزل القلب الميت وتحياه، و10 مراحل أخروية، ايه ده؟! في صفحة يا رب!! في صفحة واحدة يارب!! فعلاً والله يا جماعة "وَالْقُرْآنِ الْمَجِيدِ" ق:1.

القرآن صانع الأجداد، القرآن الذي يُغيّر الواقع، القرآن الذي يقبل حياة من أقبل عليه.

#### الإعجاز القرآني في سورة الحجرات

كنت رايح أدّي خطبة الجمعة امبارح فقلت أدّي سورة ق، وأنا واقف مع "وَالْقُرْآنِ الْمَجِيدِ" أول مرة آخذ بالي إنّ السورة اللي قبل سورة ق سورة الحجرات، فبيص في سورة الحجرات كده قلت ايه أجداد القرآن اللي في سورة الحجرات؟؟ لقيت سورة الحجرات بتتكلم عن ناس أخلاقهم ضايعة، ناس يا جماعة مايتسموش بني آدمين أصلًا.

"لَا تُقَدِّمُوا بَيْنَ يَدَيِ اللَّهِ وَرَسُولِهِ" الحجرات:1، يعني ناس بتعلي صوتها على صوت النبي -عليه الصلاة والسلام- وبتقدّم فكرها على القرآن والسنة، "لَا تَرْفَعُوا أَصْوَاتَكُمْ فَوْقَ صَوْتِ النَّبِيِّ" الحجرات:2، ناس بتعلي صوتها على النبي، "إِنَّ الَّذِينَ

**يُنَادُونَكَ مِنَ وَرَاءِ الْحُجُرَاتِ أَكْثَرُهُمْ لَا يَعْقِلُونَ** الحجرات:4، ناس ما عندهاش ترتيب، يا محمد، طيب النبي ليه مواعيد خروج، مواعيد مبين؟ ناس همجية، **"يَا أَيُّهَا الَّذِينَ آمَنُوا إِن جَاءَكُمْ فَاسِقٌ بِنَبَأٍ"** الحجرات:6، ناس مستعدة توصل بأي طريق حتى لو طريق الوقعة بين الناس، **"وَإِنْ طَائِفَتَانِ مِنَ الْمُؤْمِنِينَ اقْتَتَلُوا"** الحجرات:9، ناس حتى بعد ما دخلوا الدين كانوا زمان بيدبحوا بعض ويقتلوا بعض، ممكن تثور شهوة القتل والدم تاني.

**"يَا أَيُّهَا الَّذِينَ آمَنُوا لَا يَسْخَرَكُم مِّن قَوْمٍ"**، **"وَلَا تَلْمِزُوا أَنفُسَكُمْ"**، **"وَلَا تَنَابَزُوا بِاللُّقَابِ"** الحجرات:11، ناس بتنهش في بعض، **"وَلَا يَغْتَب بَّعْضُكُم بَعْضًا أَيُّبُّ أَحَدُكُمْ أَنْ يَأْكُلَ لَحْمَ أَخِيهِ مَيْتًا"** الحجرات:12 ناس بتنهش في لحم بعض وهم أموات ناس بتغتاب وتلمز، **"يَمُنُونَ عَلَيْكَ أَنْ أَسْلَمُوا"** الحجرات:17 ناس بتمن على ربنا إنها بتصلي وبتصوم!!!.

قلت فعلاً **"وَالْقُرْآنِ الْمَجِيدِ"**، القرآن اللي حول الغنم دول لبني آدمين عملوا أعظم حضارة في تاريخ البشرية، هو فيه مجد بعد كده؟!، **"قَالَتِ الْأَعْرَابُ آمَنَّا"** الحجرات:14، إن الكفار دول أسلموا، إن الكفار الهمج دول الغنم دول اتوحدوا وبقوا خلافة إسلامية واحدة، إن الهمج دول اللي عندهم الأخلاق الكارثية اللي موجودة في سورة الحجرات دول وصلوا لهذه الدرجة الجبارة من الأخلاقيات وبقوا أعظم حضارة أخلاقية وعلمية في تاريخ البشرية، فعلاً **"وَالْقُرْآنِ الْمَجِيدِ"** يا جماعة.

**"وَالْقُرْآنِ الْمَجِيدِ"** هو ده طريق المجد، هو ده طريق المجد، مش عاوز أطول عليكم بقى، دلوقتي بإذن الله - سبحانه وتعالى - وقفة من أجل الإنفوجراف اللي نلخص فيه إن شاء الله بإذن الله درس اليوم.

### الإنفوجراف

الليلة يا جماعة خدنا 5 مراحل جديدة من مراحل الدار الآخرة، خدنا مرحلة النار **"يَوْمَ نَقُولُ لِحَبَّئِمَّ هَلْ أَمْتَلَأْتِ وَقُولُ هَلْ مِنْ مَزِيدٍ"**، خدنا مرحلة الجنة **"وَأُزْلِفَتِ الْجَنَّةُ لِلْمُتَّقِينَ غَيْرَ بَعِيدٍ"**، خدنا النظر لوجه الله **"وَلَدَيْنَا مَزِيدٌ"**، خدنا الصراط والقنطرة **"ادْخُلُوهَا بِسَلَامٍ"**.

لولا إن لسه فيه أخطار مكنش يتقال **"بِسَلَامٍ"**، معناه إن فيه خطر فيه ناس هتقع فيه ولكن إنتم من قبل الخطر ده بتبشروا بالسلامة.

إيه اللي بعد العرض على الله من أخطار لسه في يوم القيامة؟ الصراط والقنطرة.

**خمس مراحل والمرة اللي فاتت خدنا خمس مراحل للدار الآخرة:**

1. خدنا الاحتضار **"إِذ يَتَلَقَّى الْمُتَلَقِّيَانِ"** ق:17، الملكين اللي مستنيين ياخدوا الروح من ملك الموت ساعة الاحتضار.
2. الموت **"وَجَاءتْ سَكْرَةُ الْمَوْتِ بِالْحَقِّ"** ق:19.
3. البعث **"وَنُفِخَ فِي الصُّورِ ذَلِكَ يَوْمُ الْوَعِيدِ"** ق:20.
4. الحشر **"وَجَاءتْ كُلُّ نَفْسٍ مَعَهَا سَائِقٌ وَشَهِيدٌ"** ق:21، محدش هيفلت.

5. العرض على الله "وَقَالَ قَرِينُهُ هَذَا مَا لَدَيَّ عَتِيدٌ" ق:23، ده قرين الملائكة، "قَالَ قَرِينُهُ رَبَّنَا مَا أَطْعَمْتَهُ" ق:27 ده قرين الشياطين، ساعة العرض على الله وربنا يبصدر الحكم "أَلْقِيَا فِي جَهَنَّمَ كُلَّ كَفَّارٍ عَنِيدٍ" ق:24.

يبقى دول 10 مراحل أُخروية، في الصفحة الثانية من سورة "ق" أكبر موسوعة قرآنية شاملة حَوّت على مراحل الدار الآخرة، حَوّت على 10 مراحل للدار الآخرة:

الاحتضار، الموت، البعث، الحشر، العرض، النار، الجنة، النظر لوجه الله، الصراط، القنطرة.

### الصدمات الكهربائية

الصفحة الثانية يا جماعة من سورة ق شملت كمان 3 صدمات كهربائية:

1. صدمة إنهم اكتشفوا إن النار طلعت كائن حي "وَتَقُولُ هَلْ مِنْ مَزِيدٍ".
2. وإن الجنة طلعت كائن حي بيشتاق وبيجري على حبايبه اللي اشتاق ليهم "وَأُزْلِفَتِ الْجَنَّةُ لِلْمُتَّقِينَ".
3. إن كان ربنا معيّن لكل واحد ملك يأمره بالخير، وإبليس كان معيّن لكل واحد شيطان يأمره بالشر. في وسط ال 3 صدمات الكهربائية دول ربنا جاب في الصفحة دي سلّمين سلم الهبوط وسلم الصعود.

### سلم الهبوط

سلم الهبوط "أَلْقِيَا فِي جَهَنَّمَ كُلَّ كَفَّارٍ عَنِيدٍ"، طيب ازاى وصلوا يا رب للكفر؟؟؟

1. "مَتَاعٌ لِلْخَيْرِ" الأول منعوا الخير اللي في أيديهم.
2. "مُعْتَدٍ" اعتدوا على الخير اللي في أيدين الناس وبقوا يعتدوا على الخلق.
3. "مُرِيبٍ" بعد الاعتداء على الخلق بقى الاعتداء على الخالق.
4. "جَعَلَ مَعَ اللَّهِ إِلَهًا آخَرَ".

يبقى ده سلّم الاهتبار.

### الشروط الأربعة لدخول الجنة

وبعد كده سلّم الصعود ها "وَأُزْلِفَتِ الْجَنَّةُ لِلْمُتَّقِينَ غَيْرَ بَعِيدٍ"، الشروط الأربعة لدخول الجنة:

1. "أَوَّابٍ" عنده أورايد عبادة عملية بيؤوب إلى الله بيها.
  2. "حَفِيزٍ" لما عبد ربنا وزادت مساحة الطاعة في حياته تقلصت مساحة المعصية في حياته فبقى بيحفظ حدود ربنا، لما دخلت الطاعة من الباب هربت المعصية من الشباك.
  - 3، 4. "خَشِيَ الرَّحْمَنَ بِالْغَيْبِ"، "وَجَاءَ بِقَلْبٍ مُنِيبٍ" بقى من أهل المقامات القلبية، مقام الخشية والإنابة، امتى؟ لما جدار المعصية اللي حوالين القلب اتكسر، نور المقامات القلبية دخل.
- يبقى يا إخواننا سلم الهبوط وسلم الصعود خرجنا منهم ب 8 قواعد للنجاح في الدين والحياة، ثلاثة من سلّم الهبوط، وتلاثة من سلّم الصعود، واتنين بس من كلمة "أَوَّابٍ".

### القواعد الثلاثة للنجاح في الدين والحياة من سلم الهبوط

1. التشخيص المبكر للانتكاس، لازم ماتفوقيش إن دينك راح منك بعد ما يضيع، فوقي لو لقيت وِردك بضيع، لو لقيت قلبك بقى منسوب الإيمان فيه بينزل، لو لقيت قرآن معدش بيتفتح في حياتك، لو لقيت صلاة الفجر بتضيع منك وإنت مش زعلان.
2. الوقفات اللازمة، لازم تقف لازم تقفي لو وقعت في معصية سر 3 مرات ورا بعض، أو ورد العبادة بتاعك راح وإلا تبقى بتضيع دينك.
3. فقه التحصين، إن لازم تعرف الشيطان بيحكلك مين، كل نقطة هتقصر في فيها في الدين الشيطان ممكن يدخلك منها، اوعى تسيب للشيطان ثغرة يدخلك منها.

### القواعد الثلاثة للنجاح في الدين والحياة من سلم الصعود

1. قبول الترقّي، لازم يبقى عندك طموح، لازم يبقى عندك طموح في الدين، الناس طموح الدنيا واكل قلبها، طيب فين طموح الآخرة يا جماعة؟! فين طموح إن احنا نفضل نزيد ولا نتوقف عند حد في علاقتنا بالله.
2. قبول الترقّي التدريجي، إن عمرك ما هتوصل للي إنت عايزه مرة واحدة، لازم تقبل إن وِرد على وِرد زي طوبة على طوبة يتبنى الدين بتاعك، لازم تقبل إن دينك هيبقى زي جبل اتبنى طوبة طوبة اتبنى حجر حجر، لازم تقبل إنك الأول تبقى أوأب، وبعد كده تبقى حفيظ، وبعد كده يبقى قلبك ينصلح.
3. قبول المنهجية، إن لازم يبقى عندك خط سير منهجي، لحد امتي هتفضل تايه؟؟ لحد امتي هتفضل مشتة؟؟ لازم يبقى عندك منهج في إصلاح قلبك وفي وصولك إلى الله.

### قاعدتين للنجاح في الدين والحياة من كلمة أوأب

خدنا قاعدتين للنجاح في الدين والحياة من كلمة "أوأب"، أوأب يا جماعة اللي له وِرد عبادة يومي لو حصل زلزال مايقمش منه، له وِرد عبادة مقدّس، الحزب الجهادي المقدّس أو الورد الجهادي المقدس.

فقلنا إن أوأب خرجنا منها بقاعدتين:

1. القاعدة الأولى: الاستمرارية، عمرك ما هتجني ثمرة للدين، ولا هتوصل في الدين إلا لو استمررت، إلا لو استمررت على أورادك.
2. القاعدة الثانية: الانتقال من الفكر المشاعري إلى الفكر العملي، من فكر قلبي لما هطلب علم ألاق قلبي، هشتغل في الدعوة لما ألاق قلبي، هجتهد في العبادة لما ألاق قلبي، إلى فكر وِرد، إلى إن ربنا جاب "أوأب" قبل "وَجَاءَ بِقَلْبٍ مُنِيبٍ"، الورد قبل القلب، اثبت على العبادة حتى لو مش لاق قلبك وبعد فترة هيبجي قلبك، اوعى تبقى عابد حال يعني عابد لذّة القلب ولذّة مشاعر القلب، خليك عابد لربنا، بدل "إيه حال قلبي" نشيل الجملة دي ونخليها رقم 2 بعد "إيه حال وِرد مع الله".

**خاتمة الحلقة**

إخواني وأحبابي في الله وصلنا لنهاية الحلقة بفضل ومنة الله - سبحانه وتعالى-، 6 حلقات لحد دلوقتي في سورة "ق" يا جماعة، إن شاء الله بإذن الله الحلقة الجاية هي السابعة والثابتة بقي إن شاء الله بإذن الله، وإن شاء الله الحلقة الجاية هناخد خاتمة السورة الخاتمة الممتعة.

أحنا تكلمنا عن سلم الصعود في الصلاح النهارده، المرة الجاية سلم الصعود في الإصلاح، **ازاي أبقى داعٍ إلى الله، ازاي ترتقوا في الدين.**

سورة "ق" بتكلم الناس اللي عايزة تزيد في دين ربنا، اللي عايزة تزيد في الصلاح وتزيد في الإصلاح، النهارده كلمنا اللي عايز يزيد في الصلاح، المرة الجاية إن شاء الله اللي عايز يزيد في الإصلاح ويبقى صالح مصلح. المرة الجاية إن شاء الله مع رحلة مائة يا جماعة بإذن الله مع خاتمة سورة "ق" بإذن الله وآخر آيات السورة، ثم العنصرين الآخرين في الخطة العشرية اللي تكلمنا عنها في أول حلقة مع السورة وصناعة الحياة، **ازاي إن أحنا ننجح في حياتنا وفي ديننا من خلال سورة "ق"**، ومع النقطة الأخيرة من أراد الطريق.

سبحانك اللهم وبحمدك، أشهد أن لا إله إلا أنت، أستغفرك وأتوب إليك، وجزاكم الله خيراً.

**تم بحمد الله**

**شاهدوا الدرس للنشر على النت في قسم تفرغ الدروس في منتديات الطريق إلى الله وتفضلوا هنا:**

<http://forums.way2allah.com/forumdisplay.php?f=36>